



PETIKAN AKHBAR

Bernama - Belanjawan 2021: Peruntukan Perbelanjaan RM322.5 Bilion

PETIKAN AKHBAR | 06 NOVEMBER 2020



KUALA LUMPUR, 6 Nov - Belanjawan 2021 memperuntukkan perbelanjaan berjumlah RM322.5 bilion, perbelanjaan terbesar dalam sejarah, kata Menteri Kewangan Tengku Datuk Seri Zafrul Tengku Abdul Aziz.

Beliau berkata jumlah itu merangkumi RM236.5 bilion bagi perbelanjaan mengurus, RM69 bilion bagi pembangunan dan RM17 bilion di bawah Kumpulan Wang COVID-19, manakala RM2 bilion lagi diperuntukkan bagi simpanan luar jangka.

“Mengambil kira anggaran itu, defisit fiskal 2021 diunjur pada kadar 5.4 peratus berbanding Keluaran Dalam Negara Kasar (KDNK),” katanya ketika membentangkan Belanjawan 2021 dengan tema ‘Teguh Kita, Menang Bersama’ di Dewan Rakyat, hari ini.

Ini merupakan belanjawan pertama kerajaan Perikatan Nasional pimpinan Perdana Menteri Tan Sri Muhyiddin Yassin selepas dibentuk Mac lepas.

Pada Belanjawan 2020 yang diumumkan kerajaan Pakatan Harapan tahun lepas, sebanyak RM297 bilion diperuntukkan.

Tengku Zafrul berkata susulan penularan COVID-19, prestasi kutipan hasil kerajaan telah terjejas, justeru hasil kerajaan pada tahun 2020 telah disemak semula kepada RM227.3 bilion, hampir RM18 bilion kurang daripada unjuran asal sebanyak RM244.5 bilion seperti diumumkan dalam Belanjawan 2020 sebelum ini.

Walaupun dalam keadaan hasil yang kurang, katanya kerajaan tidak berkompromi bagi melindungi nyawa dan kehidupan dalam memerangi COVID-19.

“Maka, jumlah perbelanjaan keseluruhan tahun 2020 dianggar sebanyak RM314.7 bilion, meningkat RM17.7 bilion berbanding unjuran asal.

“Peningkatan perbelanjaan ini bertujuan membiayai pakej rangsangan dan pemulihan ekonomi. Sehubungan itu, defisit fiskal bagi tahun 2020 dianggar meningkat kepada enam peratus berbanding sasaran asal 3.2 peratus,” katanya.

Bagi tahun hadapan, walaupun menjangkakan kesan COVID-19 akan terus dirasai, Tengku Zafrul berkata kutipan hasil kerajaan tahun hadapan dijangka meningkat berbanding tahun ini kepada RM236.9 bilion.

“Namun demikian, kerajaan memutuskan supaya Belanjawan 2021 merupakan belanjawan yang mengembang atau expansionary,” katanya.

Beliau turut menjelaskan bahawa dalam merangka belanjawan berkenaan, buat pertama kalinya siri jelajah dan konsultasi ke seluruh negara telah dilaksanakan dengan lebih 38 sesi dialog melibatkan lebih 40 bidang perniagaan dan perusahaan.

Katanya Kementerian Kewangan juga telah mengadakan sesi libat urus bersama kepimpinan Kementerian Kerajaan Persekutuan, kepimpinan Kerajaan Negeri, kapten industri, ahli akademik, badan-badan bukan kerajaan, pemimpin parti politik dan pelbagai lapisan rakyat.

Tambahnya, ia dirangka berdasarkan tiga matlamat induk iaitu Kesejahteraan Rakyat, Kelangsungan Perniagaan dan Ketahanan Ekonomi.

“Kesemua matlamat ini merupakan kesinambungan kepada pekej Prihatin, Prihatin PKS Tambahan, Penjana, dan Kita Prihatin,” katanya.

-- BERNAMA

 [Siaran Media](#)

 [Koleksi Ucapan](#)

 [Petikan Akhbar](#)

 [Foto](#)

 [Video](#)

 [Pengumuman](#)

POPULAR TAGS

[BERNAMA](#)[HARGA MINYAK](#)[PRICE OF PETROLEUM](#)[TENGKU ZAFRUL](#)[BANTUAN PRIHATIN NASIONAL](#)[KWSP](#)[I-SINAR](#)[SINAR HARIAN](#)[JELAJAH BELANJAWAN 2021](#)[PRIHATIN MOF](#)[PERMAI](#)[BERITA HARIAN](#)

